



REPUBLIKA E SHQIPËRISË

KUVENDI

**L I G J
(PROJEKT)**

_____ / 2019

PËR

**NJË NDRYSHIM NË LIGJIN NR. 10 431, DATË 09.6.2011
"PËR MBROJTEN E MJEDISIT", I NDRYSHUAR**

Në mbështetje të neneve 78 dhe 83 pika 1 te Kushtetutës, me propozimin e Këshillit të Ministrave,

**K U V E N D I
I REPUBLIKËS SË SHQIPËRISË**

V E N D O S I:

Ne ligjin nr. 10 431, datë 09.6.2011 "Për mbrojtjen e mjedisit", i ndryshuar, bëhet ndryshimi si më poshtë:

Neni 1

Pika 2 e nenit 29 ndryshon si më poshtë vijon:

“2.Dhënia e lejeve të mjedisit përcaktohet sipas një sistemi të përbërë prej dy nivelesh, mbështetur në madhësinë dhe llojin e veprimtarisë që ka nevojë të pajiset me leje, si dhe në mundësinë që ka ajo veprimtari të shkaktojë ndotje në atë masë që mund të sjellë dëm në mjedis dhe të rrezikojë shëndetin e njeriut:

a)kategoria e veprimtarive A, për të cilat zbatohet leja e mjedisit e tipit A;

b)kategoria e veprimtarive B, për të cilat zbatohet leja e mjedisit e tipit B;

Kategoritë e veprimtarive dhe kufijtë ndërmjet dy niveleve përcaktohen në ligjin për lejet e mjedisit”.

Neni 2

Në pikën1 të nenit 62, fjalia “...kryhet nga inspektorati shtetëror kompetent (më poshtë “Inspektorati”,)” zëvendësohet me “...kryhet nga struktura përgjegjëse inspektuese në fushën e mjedisit”.

Neni 3

Kudo në tekstin e ligjit togfjalëshi “A, B dhe C” zëvendësohet me “A dhe B”.

Neni 4

Ky ligj hyn në fuqi 15 ditë pas botimit në Fletoren Zyrtare.

K R Y E T A R I

GRAMOZ RUÇI

RELACION

PËR PROJEKTLIGJIN

“PËR DISA NDRYSHIME NË LIGJIN NR. 10 431, DATË 09.6.2011 ”PËR MBROJTJEN E MJEDISIT”, I NDRYSHUAR

I. QËLLIMI I PROJEKTAKTIT DHE OBJEKTIVAT QË SYNOHEN TË ARRIHEN

Qëllimi i ligjit është që të lehtësojnë personat fizik/juridik nga procedurat administrative lidhur me detyrimin për tu pajisur me leje të tipit C, për aktivitete që kanë ndikimin të ulët në mjedis dhe niveli i shkarkimeve në mjedis gjatë operimit të tyre është i pallogaritshëm.

Nëpërmjet ndryshimit të këtij ligji synohet ndryshimi i sistemit të lejeve të mjedisit, duke e ndryshuar atë nga një sistem prej tri nivelesh të lejeve të mjedisit, tipi A, B apo C, në një sistem vetëm me dy nivele të lejeve të mjedisit, përkatësisht leje të tipit A dhe B, duke eliminuar kështu lejet e mjedisit të tipit C.

II. VLERËSIMI I PROJEKTAKTIT NË RAPORT ME PROGRAMIN POLITIK TË KËSHILLIT TË MINISTRAVE, ME PROGRAMIN ANALITIK TË AKTEVE DHE DOKUMENTE TË TJERA POLITIKE

Rishikimi i ligjit të sipërcituar bëhet në kuadër të paketës antikorrupsion, rritjes së transparencë në fushën e mjedisit, si dhe në përputhje me Reformën e Derregullimit dhe nuk është parashikuar në programin analitik të akteve për vitin 2019, pasi është një nisëm e ndërmarrë së fundmi në kuadër të ndalimit të informalitetit dhe korrupsionit.

III. ARGUMENTIMI I PROJEKTAKTIT LIDHUR ME PËRPARËSITË, PROBLEMATIKAT, EFEKTET E PRITSHME

Miratimi i këtij projektligji do të mundësojë që të bëhen ndryshimet e nevojshme edhe në ligjin nr. 10 448, datë 14.7.2011 “Për lejet e mjedisit” i

ndryshuar, ku të parashikohet se aktivitet që kanë ndikimin të ulët në mjedis dhe niveli i shkarkimeve në mjedis gjatë operimit të tyre është i pallogaritshëm, të mos jetë më nevoja të pajisen me leje mjedisi të tipit C, e cila i sjell qytetarëve dhe subjekteve humbje kohe dhe kosto për për pajisjen me këtë leje.

Pushteti qendror nuk mund të angazhohet për të lëshuar më leje mjedisi të tipit C për aktivitete, ndikimi i të cilave në mjedis është tepër minimal, ndërkohë që fokusi i ministrisë përgjegjëse për mjedisin dhe institucioneve të saj të varësisë është kontrolli dhe monitorimi i ndotësve të mëdhenj industrialë.

Ndryshimet e propozuara lehtësojnë ndjeshëm, si në kohë, por mbi të gjitha në koston financiare subjektet që tashmë operojnë me një leje mjedisi (tipi C), pasi ato lirohen nga tarifa vjetore e lejes së mjedisit, por dhe kosto dhe tarifa e përgatitjes së raporteve për zbatueshmërinë e kushteve të lejes së mjedisit të tipit C (një ose dy herë në vit). Gjithashtu, është një proces i rëndësishëm dhe në kuadër të reformës antikorrupsion dhe lehtësimin e procedurave për keto biznese, kryesisht të vogla, me një ndikim të ulët në mjedis.

Konkretisht nga ndryshimi i sistemit të lejeve të mjedisit, duke hequr lejet e tipit C përfitojnë rreth 6900 operatorë, të cilët nuk kanë me detyrimin të pajisen me leje mjedisi të tipit C. Pra hiqet nevoja për t'u pajisur me leje mjedisi për 47 aktivitete.

IV. VLERËSIMI I LIGJSHMËRISË, KUSHTETUTSHMËRISË DHE HARMONIZIMI ME LEGJISLACIONIN NË FUQI VENDAS E NDËRKOMBETAR

Ndryshimi i ligjit të sipërcituar bëhet në përputhje me programin e Qeverisë për të luftuar informalitetin dhe korrupsionin, e cila është një nismë për të thjeshtuar procedurat administrative për shërbimet e ofruara ndaj personave fizik/juridik dhe për rrjedhojë për të ulur korrupsionin.

V. VLERËSIMI I SHKALLËS SË PËRAFRIMIT ME *ACQUIS COMMUNAUTAIRE* (PËR PROJEKTAKET NORMATIVE)

Ndryshimet e propozuara në projekt aktin nuk transpozojnë akte të Bashkimit Evropian.

VI. PËRMBLEDHJE SHPJEGUESE E PËRMBAJTJES SË PROJEKTAKTIT.

Për të lehtësuar kuptimin e këtij projektligji sqarohet se parimet e procedurës dhe institucionet përgjegjëse, si dhe aktivitetet/instalimet bazë që duhet të pajisen me leje mjedisi janë përcaktuar e miratuar në ligjin 10448, datë 14.7.2011 “Për lejet e mjedisit” i ndryshuar.

Ky projektligj synon të përcaktojë vetëm sistemin e ri të lejeve të mjedisit të përbërë vetëm me dy nivele të lejeve të mjedisit, përkatësisht leje të tipit A dhe B, duke eliminuar kështu lejet e mjedisit të tipit C, si dhe reflektimin e ndryshimit të organeve inspektuese, referuar ristrukturimit të institucioneve të varësisë të MTM-së, përkatësisht ristrukturimi i AKM-së dhe shkrimi i ISHMPUT-së.

Në nenin 1 është parashikuar që neni 29 i ligjit ekzistues ndryshohet duke përcaktuar sistemi i ri i lejeve të mjedisit prej dy nivelesh, përkatësisht të tipit A dhe B.

Në nenin 2 dhe 3 kemi zëvendësime në tekstin e ligjit, që kanë të bëjnë me ndryshimin e organit inspektues në fushën e mjedisit dhe togfjalëshi “A, B dhe C” zëvendësohet me “A dhe B”.

VII. INSTITUCIONET DHE ORGANET QË NGARKOHEN PËR ZBATIMIN E AKTIT

Ngarkohen Ministria e Turizmit dhe Mjedisit, Agjencia Kombëtare e Mjedisit dhe Qendra Kombëtare e Biznesit për zbatimin e këtij ligji.

VIII. MINISTRITË, INSTITUCIONET DHE SUBJEKTET E TJERA QË KANË KONTRIBUAR NË HARTIMIN E PROJEKTAKTIT

Ky projektligj do të dërgohet për mendim në Ministrinë e Drejtësisë, Ministrinë e Financave dhe Ekonomisë, Ministrinë e Bujqësisë dhe Zhvillimit Rural, Ministrinë e Infrastrukturës dhe Energjisë dhe në Ministrinë e Shtetit për Mbrojtjen e Sipërmarrjes, Qendrën Kombëtare të Biznesit dhe Agjencinë për Mbështetjen e Vetqeverisjes Vendore.

IX. RAPORTI I VLERËSIMIT TË TË ARDHURAVE DHE SHPENZIMEVE BUXHETORE

Zbatimi i projektligji nuk ka efekte financiare shtesë për buxhetin e shtetit, pasi të gjitha strukturat për shqyrtimin dhe pranimin e aplikimeve për leje mjedisi të tipit A dhe B janë të ngritura, ndërsa kemi një lehtësim përse i përket procesit të aplikimit për lejet e mjedisit të tipit C, të cilat nuk do të ekzistojnë më.

MINISTRI

Blendi Klosi